

Oqaasiliortut ataatsimiinnerannit imaqarniliaq

Sumiiffik:	Ilimmarfik ini nr. 5
Ulloq:	28.04.2017
Nalunaaqutaq:	10:00
Oqaasiliortuni peqataasut:	Juaaka Lyberth, Mette L. Lyberth, Mariia Simonsen aamma Niels-Henrik Lyngø
Peqataanngitsoq:	Jens Danielsen
Oqaasileriffimmiit peqataasut:	Katti Frederiksen aamma Camilla Kleemann-Andersen
Allatsi:	Minik Jeremiassen
Ataatsimiinnerup normua:	3

Oqaluuserisat

1. Oqaluuserisassat akuerineqarnerat
2. Kingullermik ataatsimiinnermit imaqarniliap akuerineqarnera
3. Oqaasersiat taarserlugit oqaasiliorneq
 - 3.1. Blotter (Oqaluuserineqanngilaq)
 - 3.2. Autist
 - 3.3. Selvstændighed
 - 3.4. Nunatta Atuagaateqarfianit taaguutit (naammassineqanngilaq)
 - 3.5. Navianassutsimut ilisarnaatit (oqaluuserineqanngillat)
 - 3.6. Competence aamma færdsighed (oqaluuserineqanngillat)
 - 3.7. RAL-imi atorfiit taaguutaat (oqaluuserineqanngillat)
 - 3.8. Eqqartuussivimmi taaguutit (oqaluuserineqanngillat)
 - 3.9. Mistænkt aamma sigtet (oqaluuserineqanngillat)
4. Atertut qinnutigineqartut Emili aamma Asa
5. Oqaasileriffimmit ilisimatitsissutit
6. Kommunikationsstrategi
7. Taasariaqartut allat
 - 7.1. Inatsit nutaaq kingunissaalu
 - 7.2. Ataatsimeeqinnissamut ulluliineq
 - 7.3. Killiffimmik ilisimatitsineq (Oqaasersiat taarserlugit oqaasiliorneq)
 - 7.4. Ilaasortanit taasariaqartut allat
 - 7.5. Nittangerpoq pillugu

Imaqarniliaq

1. Oqaluuserisassat akuerineqarnerat:

Nittangerpoq pillugu paasissutissiissut immikkoortoq 7-imut ilanngunneqareermat oqaluuserisassat akuerineqarput.

2. Kingullermik ataatsimiinnermit imaqarniliap akuerineqarnera:

Imaqarniliaq akuerineqarpoq.

Sans aamma følesans isummamikkut assigiinngikkaluartut tamarmik malugissummik taaguuserneqarsimapput. Følesansip malugissummik taaneqarsimanera Niels-Henriup naammaginngilaa, isumaqarporlu ima taaneqaruni pitsaanerussasoq: tigussaasunik malugissut. Taamaattumik følesans ataatsimeeqqinnissami oqaluuserisassatut siunnersuutininut ilanngunneqassaaq.

3. Oqaasersiat taarserlugit oqaasiliorneq:

3.1. Blotter:

Oqaluuserisassaq ataatsimeeqqinnissamut kinguartinneqarpoq.

3.2. Autist:

Qallunaat oqaasiat autist pillugu Oqaasiliortut aalajangersaapput:

Qallunaatut	Kalaallisut
autist	autisti
han er autist	autistiuvoq
en der har autisme	autismemik innarluutilik
han har autisme	autismeqarpoq

Oqaasiliortut ilanngullugu erseqqissaatigaat ima oqartoqarsinnaanngitsoq "autisterpoq", qulaanili taaneqartut taarsiullugit atorineqartassapput.

3.3. Selvstændighed:

Kalaallit Nunaanni politikkimi selvstændighed pineqartillugu oqaatsit ulluinnarsiutaalereersut namminersulivinneq aamma namminiilivinneq taaguutissatut akuerineqassasut Oqaasileriffimmiit inassutaasimagaluarpoq, kisianni Oqaasiliortut maannakkuugallartoq aalajangiussaqaarniannigillat.

Namminiilivinnermut Naalakkersuisoq aamma Namminiilivinnermut Naalakkersuisoqarfik pillugit Oqaasiliortut Naalakkersuisoqarfimmut ima siunnersuuteqarput:

Naalakkersuisoq for Selvstændighed, Namminiilivinnissamut Naalakkersuisoq
Departementet for Selvstændighed, Namminiilivinnissamut Naalakkersuisoqarfik

Naalakkersuisoqarfimmi taaguutit uku atornerqarluarput:
Naalakkersuisoq for Selvstændighed, Namminiilivinnermut Naalakkersuisoq
Departementet for Selvstændighed, Namminiilivinnermut Naalakkersuisoqarfik

Suli namminiilivinneq/namminersulivinneq anguneqanngimmat uiguut -ssa
ilanngunneqartariaqarpoq. Taama tunngavilersuuteqarlutik Oqaasiliortut Naalakkersuisoqarfimmut
siunnersuipput.

3.4. Nunatta Atuagaateqarfianit taaguutit:

Nunatta Atuagaateqarfianiit taaguutit Oqaasiliortunut saaffiginnissutaasimasut
tamakkinngikkaluarlugit eqqartorneqarput, ataatsimiinnermilu aalajangiunneqartut imaapput:

Qallunaatut	Kalaallisut
befolkningsundersøgelser	innuttaasut peqqissusaannik misissuinerit
bevægelseslege	aalalluni pinnguarnertit
billedværker	assilissanik atuakkiat
for gymnasiale uddannelser	ilinniarnertuunngorniarnertit tunngasut
fysisk aktivitet	timimik aalatitsineq
idrætslege	timersuutit unammiaarnertit
kulturmøde	kulturit naapinnerat

Angumerineqanngitsut tullissaanut kinguartinneqarput. Maannamut killiffik tassaavoq naturgeografi,
tassungalu taaguutissaqqissutut eqqaatsiarneqartoq taassaavoq: sumiiffinni pinngortitalerineq.

3.5. Navianassutsimut ilisarnaatit

Oqaluuserisassaq ataatsimeeqqinnissamut kinguartinneqarpoq.

3.6. Kompetence aamma færdighed

Oqaluuserisassaq ataatsimeeqqinnissamut kinguartinneqarpoq.

3.7. RAL-imi atorfiit taaguutaat

Oqaluuserisassaq ataatsimeeqqinnissamut kinguartinneqarpoq.

3.8. Eqqartuussivimmi taaguutit

Oqaluuserisassaq ataatsimeeqqinnissamut kinguartinneqarpoq.

3.9. Mistænkt aamma sigtet

Oqaluuserisassaq ataatsimeeqqinnissamut kinguartinneqarpoq.

4. Atertut qinnutigineqartut Emily aamma Asa:

Oqaasiliortut ataatsimiinneranni oqaluuserineqanngikkaluartut kingorna assingusunut aalajangersaaniarnerni iluaqutissaaqqullugit imaqarniliamut ilanngunneqarput. Niviarsiaqqat aqqattut Emily Emily-mik kalaaleraluttunngorsarlugu qinnutigineqaraluartoq Oqaasiliortut emailkkut attaveqaqatigiinnerminni akuerinngilaat, kisiannili Danmarkimi akuerisaareersoq Emily atoqqullugu siunnersuutigisimallugu.

Niviarsiaqqat aqqattut qinnutigineqartup aappaa Asa akuerineqarpoq.

5. Oqaasileriffimmit ilisimatitsissutit:

Oqaasileriffimmit Oqaasiliortunut ilisimatitsissutigineqartut bilagimi takuneqarsinnaapput. Ilisimatitsissutit Oqaasiliortunit tusaatissatut tiguneqarput.

- TV-kkut aallakaatitassiaq Oqaasilerisa pillugu:

TV-kkut aallakaatitassiaq Oqaasilerisa pillugu Oqaasiliortut sukumiinerusumik paasisaqarusullutik uuma ataatsimiinnerup siuliisa ilaanni Oqaasileriffimmi sulisunut paasiniaanikuupput, Oqaasileriffiup Oqaasiliortunut allakkatigut akissutaat bilagitut ilanngunneqartumi atuarneqarsinnaavoq.

- Fagrådit pillugit ilisimatitsineq:

Fagrådit tassaassapput Oqaasiliortut suliassaannik nalilersuisartussat, tassa Oqaasileriffiup Oqaasiliortullu akunneranni inissisimasussat. Taama ittunik atuutsitsilertoqarnissaanik Oqaasileriffiup pisortaa Katti Frederiksen ilisimatitsivoq, ilisimatitsissullu bilagitut ilanngunneqartumi atuarsinnaavat.

Fagrådit pillugit ataatsimeeqqinnissami eqqartuisoqassaaq.

6. Kommunikationsstrategi:

Apriliip 18-anni 2017 Oqaasiliortut siulittaasuata Mariia Simonsenip Oqaasileriffimmi sulisunik naapeqateqarsimanera Oqaasiliortunut ilisimatitsissutigineqarpoq. Naapeqatigiinnermi tassani Oqaasiliortut suliaasa avammut qanoq nittarsaanneqartarnissaannik eqqartuisoqarpoq.

Oqaasiliortut pillugit Inatsisartut inatsisissaanni allassimasut tunngavigalugit periusissamik suliaqartoqassaaq, ilaatigullu Nuup avataani illoqarfinni internetip ajornakusoornera eqqarsaatigineqassasoq ataatsimiinnermi eqqarsaatigeqqunerpoq.

Oqaluuserisassaaq ataatsimeeqqinnissami eqqartorneqaqqissaaq.

7. Taasariaqartut allat:

7.1. Inatsit nutaaq kingunissaalu:

Oqaasiliortut pillugit Inatsisartut inatsisissaat maanna Inatsisartut upernaakkut ataatsimiinneranni siullermeerneqareersimalerpoq, partiillu tamarmik inatsisissamut isumaqataanertik oqaatigaat. Inatsisissap aappasaanik eqqartorneqarnissaa maajip 18-anni pissaaq.

Inatsisissaq Oqaasileriffimmut qanoq kinguneqassanersoq Oqaasiliortunit paaserusunneqarpoq. Pingaartumik suliassarpasuit inatsisissami taaneqartut aningaasanik qanoq kinguneqartinneqassanersut tamatumani paaserusunneqarpoq, taamaattumik Oqaasiliortut Oqaasileriffillu Inatsisartunik naapeqateqarusupput. Oqaasileriffiup pisortaa Oqaasiliortullu siulittaasuat Kultureqarnermut Ilinniartitaanermullu Ataatsimiititaliamut saqqummiussiumanerminnik allagaqassapput, saqqummiussinerminnilu Oqaasiliortut atuuffiat inatsillu, Oqaasiliortut suliassaat sullinneqarnerallu kiisalu aporfiit periarfissallu saqqummiutissavaat.

7.2. Ataatsimeeqqinnissamut ulluliineq:

Oqaasiliortut aalajangerput sap. ak. 24-mi (juuni 12-16) ataatsimeeqqissallutik.

7.3. Killiffimmik ilisimatitsineq (Oqaasersiat taarserlugit oqaasiliorneq):

Oqaasiliortut suliassaasa killiffiannik Oqaasiliortut allattaat ilisimatitsivoq.

7.4. Ilaasortanit taasariaqartut allat:

Inatsisartunut ilaasortap Mimi Karlsenip oqaatsinut kiffartuussivimmik pilersitsisoqarnissaanik siunnersuutaa Oqaasiliortunit eqqartorneqatsiarpoq. Tassa Mimi Karlsenip Naalakkersuisut oqaatsinut kiffartuussivimmik pilersitseqqullugit siunnersuuteqarpoq, kiffartuussiviullu kalaallisut oqaatsitta atorneqarnerinik nakkutilliivissatut aammalu siunnersuinerinik ingerlatsivissatut, kiisalu tusagassiutini oqaatsitta atorneqarnissaannik ilinniartitsivissatut takorloorneqarpoq. Kiffartuussiviullu Oqaasileriffimmut inissinneqarnissaa eqqarsaatigineqarpoq.

Oqaasiliortunut ilisimatitsissutigineqarpoq Mimi Karlsenip Oqaasileriffimmi sulisut tamatuminnga attavigisimanagillu ilisimatissimanngikkai.

Oqaasiliortuniit oqaatigineqarpoq Oqaasileriffik kalaallisut oqaatsinik ilinniartitsinermik suliassa qarfiunngitsoq. Oqaatsinik pikkorissaavik (Sprogcentret) Sisimiuniittoq ilinniartitsinermik imaluunniit pikkorissaanermik ingerlatsissappat pissusissamisoornerusaaq.

7.5. Nittangerpoq pillugu kukkusumik nassuiaasoqarsimaneranik ilisimatitsineq:

Marsip 25-anni 2013-imi Oqaasiliortut ataatsimiinnerminni nittangerpoq pillugu apeqquteqartumut nassuiaasimapput nittaakkunnaarpoq-mik isumaqarnerarlugu, tamannali kukkuneruvoq. Tasa nittangerpoq aamma nittaallerpoq isummamikkut assigiipput.

Oqaasiliortut

Allatsi

Mariia Simonsen, siulittaasoq

Minik Jeremiassen

Mette L. Lyberth


Juaaka Lyberth

Niels-Henrik Lyng



Oqaasileriffimmit paasisutissat

1. Ekspertgruppen Norden Sprogråd marsimi Københavnimi ataatsimiippoq. Nunarput sinnerlugu KF peqataavoq. Ataatsimiinnerup imaraa Avannaamioqatigiit oqaatsitigut suleqatigiinnerisa pitsanngorsarneqarnissaat kiisalu oqaatsinik paasinninnissami kulturip qanoq pingaaruteqarnera qanoq takutinneqarsinnaanera. Ilanngullugu aasamut Nordisk Sprogfestivalertitsinissaq Århusimi pisussa (18.-21. september) kikkunnilluunniit peqataaffigineqarsinnaasoq saqqummiunneqarpoq. Tassani aamma *Nordisk Sprogmede* ingerlanneqassaaq Miniup allatsitit peqataaffigisinnaasaa. Uaniippoq pilersaarut sukumiinerusoq: <http://www.sprogkoordinationen.org/media/1446/program-mars.pdf>
2. Oqaasiliortut aamma Nunat Aqqinik Aalajangiisartut inatsisissaat pillugit Inatsisartut siullermeerinninnerminni naatumik eqqartorneqarpaat suli tamakkiinerusumik aningaasatigut sinaakkutit pitsanngorsartariaqartut, tamannalu pillugu aamma Aningaasaqarnermut Naalakkersuisoqarfik attavigineqartoq. Aappassaaneerinnineq pissaaq maajip ulluisa 18-ianni, pingajussaaneerineqassalluni maajip 24-anni.
3. KF Islandimi nunat tamalaat akornanni oqaatsinut illorsuassap ammaanersiornerani qaaqusaalluni peqataavoq. Apriilip 20-anni ammaanersiorneq pivoq, kingornalu illorsuaq atoqqaarfissiorlugu ataatsimeersuartoqarluni, tassani qitiusumik eqqartorneqarpoq Nunat Avannarliit Killiit oqaatsitigut ilisimatusaatinik suleqatigiinnissaannik ilusiliinissamik pilersaarutit assigiinngitsut. Oqaasileriffiup soqutigalugu peqataaffigissavaa 1850-imiit 1950-ikkut tikillugit Atuagalliutitoqqani oqaasersiat oqaasiallu nutaat atorineqartarnerisa misissuiffiginissaat, kiisalu oqaatsit pillugit isiginnittaatsit ineriartorsimaneri. Atuagalliutitaqqani misissuinissaq korpusiliatta aamma ineriartortinneqarneranut iluaqutaasussaavoq oqaasersiallu oqaatsitsinnut qanoq sunniuteqarsimanerisa ineriartornerat takussutissiarineqarsinnaalissalluni.
4. Kalaallisuumiit tuluttuumut ordbogip ilusissaa siulleq piariivippoq, maajillu qiteqqunnerani App-itut nittartakkatullu atorsinnaasunngornera avammut nalunaarutigineqassalluni. Kukkunersiusuuvoq GU-mi tuluttoortitsisoq Arnannguaq K. Christiansen
5. DAKA App-itut aaneqarsinnaajunnaartoq pillugu Naalakkersuisoqarfimmut saaffiginnissuteqaratta DAKA-p imarisai atorlugit App-ilioqqinnissamut aningaasalerneqarpugut.
6. Sprogteknologii pillugu GU-qarfinni CBS suleqatigalugu saqqummeeqattaarlutalu workshopertitsisaqattaaratta inuusuttut katillugit 40-t tungaannut peqataapput. Tassani annerusumik sammeneqarput nunarsuarmi oqaatsit ineriartorsimaneri, qarasaasiaq atorlugu oqaatsitigut ilisimasatigut allatigullu iluaquteqarsinnaaneq il.il. Siunertaavoq inuusuttut GU-reersut oqaatsit teknologiillu iluanni ilinniagaqarsinnaanissaanik kajumilersitsinissaq Oqaasileriffiullu ilisimaneqarnerulernissaa.



Paasisimasalinnik suleqateqarneq pillugu maleruagassaq

Oqaasiliortut, apriliip 24-anni 2017

Tunnngavik

Oqaasiliortut pillugit Inatsisartut inatsisaanni nr. 12, 26. oktober 1989-imeersumi §§ 3 aamma 4 tunnngavigalugit Namminersornerullutik Oqartussat nalunaarutaanni nr. 23, 15. maj 1990-imeersumi ilaatigut § 3-mi ima aalajangersaasoqarpoq:

- (...) [Suliat] Oqaasiliortunit akuerineqartinnatik misissorluarneqaqqaartassapput paasisimasallit suleqatigalugit.
Imm. 2. Oqaasersiat kalaallit oqaasiinut ilannguttussatut akuersissutigineqartinnagit, Oqaasiliortut periarfissaqarsimassapput nalilersussallugu allanneqarnikkut oqalunnikkullu kalaallit oqaasiisa nipaannut pissusiannullu tulluarsarneqarsinnaanersut.
Imm. 3. Akuersissutiginniittussaaneq akuersissutiginnittartunut allanut tunniunneqarsinnaanngilaq.

Tamanna tunnngavigalugu Oqaasiliortut suliasaqarfimmi iluini akuersitinnatik immikkut paasisimasalinnik suleqateqartarnissaminut maleruagassaliorput. Suliat assigiiarnerusumik, pitsaannerusumik sukkanerusumillu naammassineqarlutik inuiaqatigiinnut atugassianngortinneqartarnissaat taamaasiornikkut anguneqarsinnaammat.

Siunertaq imarisaalu

Immikkut paasisimasallit Oqaasiliortunut akuerisassanngorlugit Oqaasileriffimmi sulisunit piareersakkat oqaaseqarfigisinnaasassavaat nalilersorlugillu.

Immikkut paasisimasallit toqqarneqartassapput:

- Ilinniagaat, misilittagaat paasisimasaallu tunnngavigalugit
- Oqaasileriffiup, Oqaasiliortut allalluunniit piukkussaat toqqarneqarsinnaapput
- Nalilersuisinnaassuseqarluartut suliaqarfinnullu aalajangersimasunut itisuumik paasisimasallit
- Siunnersuisinnaassuseqartut, taamaattoq erseqqissaatigineqartassaaq aalajangiisinnaassuseq kisimi Oqaasiliortuniimmat allanullu tunniunneqarsinnaanani
- Paasisimasallit piffissami pisariaqartinneqartumi taamaallaat atuuttassapput, tassa suliap Oqaasiliortunit akuerineqartussap naammassinissaata tungaannaanut atuuttassapput
- Paasisimasallit amerlanerpaamik tallimaasassapput, ikinnerpaamik marluusassallutik
- Paasisimasallit ataatsimiinnermusiaqartinneqassapput Inatsisartut inatsisaat **X.X** naapertorlugu siumoortumik aningaasatigut missingersuusiorneqartassallutik, soorlutaaq Oqaasiliortut pillugit nalunaarummi § **X**-imi tamanna eqqaaneqartoq

Immikkut paasisimasalinnik toqqaasoqareerneratigut makkua Oqaasileriffimmit paasisimasalinnut nassuiaatigineqassapput:

- Suliap aqqa, siunertaa imarisaalu
- Suliap aallartinnera piareersarneranilu aqqusaakkat (pitsaaqutit/aporfiit il.il.)
- Immikkut maluginiagassaqaassappat ilanngullugit nassuiaatigineqassapput
- Paasisimasallit nalilersuinerminni suut isiginiassaneraat, imarisaanut tunngasuusinnaapput, suliap imarisaata ataqatigiissarneqarneranut tunngasinnaapput kiisalu kikkut atuisussaeneri tunngavigalugit kalaallisut allanneqarneri/oqaasiliorneqarneri pitsaasumik suliaanersut

Immikkut paasisimasallit makku suliarissavaat:

- Suliami siunertarisaq torarneqarsimanersoq nalilersussallugu
- Suliami pitsaassuseq nalilersussallugu; suut pitsaasumik suliarineqarsimappat allallu suli pitsanngorsagassatut tikkuartukkatik qanoq pitsaanerulersinnissaannik siunnersuuteqassallutik
- Paasisimasallit iluminni isumaqatigiinngissuteqarsimagunik taakkua aamma nalunaarsussallugit tunngavilersussallugillu Oqaasiliortut aalajangiinissaannut tunngavissilluarniarlugit.
- Suliap imarisaani pitsaaqutaasa sanngeequtaasalu kingunerisinnaasaat allallu nassuiaatigineqassallutik
- Paasisimasallit suliatik pillugit avammut nalunaaruteqarsinnaanngillat, Oqaasileriffilli aqqutigalugu Oqaasiliortunut oqaatigiumasaminnik apuussaqaarsinnaallutik
- Oqaasiliortut piumasarippassut pisariaqartitsineq naapertorlugu immikkut paasisimasallit tamarmik imalt. ilaannaat aggersarlugit nassuiaateqartissinnaavaat
- Paasisimasallit suliarfik naammassippat suleriaaserisimasartik nalilersussavaat, Oqaasileriffik taamaasilluni misilittakkat katersorlugit pitsanngorsaanissamut tunngavissaqarluartassaaq.
- Ataatsimiissutissat nassuiaatigineqarnerilu Oqaasileriffiup isumagissavaa, ataatsimiinnerullu ingerlanneqarnissaa suleriaatsillu ilusissaa suleqatigiit namminneq aalajangissavaat
- Paasisimasallit suliarfik naammassigunikku Oqaasileriffiup pitsanngorsaatissat aqqissussavai Oqaasiliortunut akueriteriaannanngorlugu

Oqaasileriffik aamma Oqaasiliortut/24.04.2017

OQAASILERISA (oqaasilerineq itisilikkamik tunngavilersukkamillu nassuiaatigineqartarluni aallakaatitassiarineqarnera nangeqattaartoq)

Oqaasileriffik/2016-2017/faglig indsats

Sooq pisariaqarpa?

Oqaasileriffimmut saaffiginnissutit arlaqartut oqaasilerinermut tunngasut assigiiartarput, taamaattumik pisariaqartitsineq malillugu KNR-ip suleqatigineratigut una aallakaatitassiaq pilersinneqarpoq apeqqutigineqakulasartut sukumiinerusumik takussutissiortarlugit nassuiarsinnaanerujumallugit.

Suliap siunertaa: TV-kkut aallakaatitassiap Oqaasilerisa-mik taaneqartup siunnertaraa inuiaqatigiinnut oqaasilerineq pillugu soqutiginnittunut, pingaartumik aamma ilinniartitsisunut, (envejskommunikation atorlugu) paasisutissiinissaq/ilitsersuinissaq. Learning TV-tut atorneqarsinnaanissaa, tassa ilinniut TV-kkoortoq.

Saaffigisat: Inersimasut oqaatsitsinnik soqutigisaqartut paasisaqarnerorusuttullu; ilinniartitsisut, ilinniarnertuunngorniat, tusagassiortut allallu ilisimatusaatit tunngavigalugit nassuiaasersukkanik oqaasilererusuttut. Ilinniartitsisunut ingammik iluaqutaasinnaasutut takorloorneqarpoq.

Imarisaa:

Aallakaatitassiaaqqani nangeqattaartuni oqaasilerinerup iluani sammisat qulequtaaqqanut assigiinngitsunut 20-nut agguataarneqassapput. Aallakaatitassiani sammineqartut pillugit nassuiaarenermi assersuutinik takutitsisarnissaq pingaartinneqassaaq. Aallakaatitassiat sularineqarnerini/ilusilersorneqarnerini takussutissialiorneq qitiussooq, - oqaluinnartuunani, tamanna aallakaatitassiap soqutiginarsarnissaanut sammisallu paasinarsarnerunissaanik siunertaqarpoq. Oqaasiliortut oqaasilerinermut taaguutit akuerisaat tamakkiisumik malinneqassapput. Aallakaatitassiaaqqat 20-it sananeqarput, ataqatigiisumik isiginnaagassatut takorluugaallutik.

Anguniakkat:

- Ilisimasanik tunniussuineq / oqaasilerinermik ilisimasanik saqqummiussuineq
- Ilinniartitsisut (meeqqat atuarfiini GU-nilu) paasisutissanik tigorianaannarnik aallerfigisinnaasaannik pilersitsineq
- Oqaasilerinerup pitsaanerusumik paasisimasaqarfigineqalernissaa tunngavissalimmillu nassuiaatigineqarfigineqartalernissaa

Suliassanik agguataarineq:

Aallakaatitassianik sularinnittuussapput: Camilla Kleemann-Andersen, Malik Høegh kiisalu Inunnguaq Kristensen.

Imaanik aqqissuisutut Camilla Kleemann-Andersen inissisimavoq, Malik Høegh aallakaatitassiat isiginnaartunut paasinartunngortinnissaat suleqataaffigalugulu nassuiaatit paasinartumik oqaasertalersornissai siunnersuisuuffigai.

Inunnguaq Kristensen teknikkikkut suliassat suleqataaffigai aallakaatitassiallu teknikkikkut ilusilersornera sularialugu.

Suliap naammassineqarnissaa:

Aallakaatitassiaaqqat ataasinngornerit tamaasa aallakaatinneqartassapput. Aallakaatitassiaq kingulleq maajimi aallakaatinneqareerpat suleqatigiit iluanni nalilersuineq aammalu innuttaasut isiginnaarsimasut apersorlugit nalilersuisoqarumaarpoq.